

普天直隸廳志

普安直隸廳志卷之二十一

藝文

文二

吏部主事楊彝墓誌銘

明沈昂

楊彝字秉彝餘姚人少卓犖凡經史文章書畫之藝無不習而尤長於詩故當時有楊家兄弟最能詩之說  
洪武初以人才舉爲沔陽倉副遷都察院司獄有鳳臺稟調福建長泰縣主簿仲子顯被誣獄死刑  
長子志隸戍普安彝聞之赴京獻詩自陳上覽之大

書  
卷三  
一  
悅遷吏部考功主事往往朝士遇公卽曰黃金闕下  
飛來也公詩末句丹心一點隨雲氣長繞黃金闕下  
飛故云二十四年從駕之華山上覽勝賦詩稱旨乞  
致仕就養戍居青衿濟濟爭執束脩暇日偕縉紳游  
宴嘯歌惟興所適雖仲宣客荊州子美寓劔南蔑以  
過之居東屯四顧皆松開軒其中扁曰萬松因自號  
曰萬松老所著有鳳臺貴竹東屯南游諸稿古今律  
選歌詞卒年八十沈勗銘其墓曰才兼行偉身與名  
存雄詞藻翰蛟舞鳳騰

鐵索橋論

國朝田雯

唐明皇作橋於蒲阪夏陽津鑄鐵牛八植柱纜二十四連鎖十二山架八牧人入於中流分立亭亭如虹蜺之狀稱奇絕焉然此乃安流通津作之者易不若盤江鐵索橋之難且奇也盤江之源出自金沙入烏撒繞曲靖西道畢節七星關而注於安南入滇所必經也兩山夾峙一水中絕斷岸千尺湍激迅悍類天設以界滇黔不知莊蹻當日何以飛渡也往以舟濟多墮溺明天啟間監司朱家民擬建橋而不可以石

乃仿瀾滄之制治鐵爲絙三十有六長數百丈貫兩  
 巖之石而懸之覆以板類於蜀之棧而道始通其功  
 偉矣然絙長則力弱人行其上足左右下絙輒因之  
 升降身亦爲之撼揺眩掉不自持車馬必下前者陟  
 岸後者始登若相躡則愈震其險也不可名狀邇乃  
 濟之以木擇材之巨者數百排比之臥於兩巖水次  
 鎮以巨石挂以強榦層纍而加參差以出鏑其本使  
 固及兩木之末不屬者僅三十尺有四則又選圍可  
 丈之木交其上而後行者可方軌聯鑣貫魚逐隊而

不驚也。猶且施之以欄楯，疇之以版屋，塗之以丹雘。  
梵宇琳宮，鱗次於巖之左右，輝煌掩映如小李將軍  
圖畫。遂爲西黔勝概焉。以視十二之連鎖直緯索耳。  
況於沉江之陋耶？論曰：余聞之黔人矣。去盤江二十  
里，由鎮甯僻徑西行，渡花河，厯普安、黃草壩，入彝、鮮  
亦資孔水淺而路平，赴滇差便。乃何以萬里昆明舍  
坦途而就艱阻也？明初傅湯諸人伐山開道，拓疆闢  
土，之曰：豈其狃於成見而未之聞歟？抑盤江爲烏蠻  
郎僭地，不欲其奇險，足恃故，深思遠計，爲驛使往來。

之衢以通王會之車書也不然望站站之飛鳶以祀  
神於金馬碧雞之境不已難乎

盤江考

晏斯盛

自莊躋畧地楸船且蘭而牂柯江始出然循江循沅  
前後漢書異指江沅番禺莊躋唐蒙殊歸桑欽酈元  
西南未覈山溪分合畧而不詳序旣著牂柯江論復  
據遊覽所經考證圖志記其水道存隅識焉盤江廣  
輿圖以爲牂柯江水水出滇南小金沙江至威甯府  
界東南流爲可渡河有橋曰可渡橋山曰分水嶺威

甯舊烏撒衛也明鄭氏曰予弭節西南抵烏撒普德  
歸驛驛門對可渡河堧詢水所從候吏稱水在西百里  
注壑而出流爲盤江又曰越衛城北二百餘里有七  
星關河源出芒部界濱城海子通水西境會可渡爲  
盤江第山水峭險猱獠叢居以是人無因而至據今  
七星關水爲分水嶺所界東出烏江不注可渡又小  
金沙江一名北金沙江來自吐番由雲南麗江府之  
塔城關入中國經鶴慶姚安武定東川諸府至四川  
之叙州府與岷江合入於東海與盤江之從粵以入

南海者源流迥異則鄭氏後說與廣輿圖所載俱舛  
矣可渡河又東南流迤西至木東汎有花魚洞水西  
來注之又南至龍場汎有水自曲靖府流來注之又  
南至安南縣東北有落白河自曲靖府界東流來注  
之又東至永甯州西安南縣東是爲盤江有橋曰盤  
江橋爲入滇孔道兩山夾行水勢湍駛不利操舟亦  
難架石明參政朱家民治鐵爲絙懸兩崖間覆以板  
東西各建樓堞行者賴之尋爲賊毀

國朝經畧洪承疇統大兵定滇濟此復完至今歲用修

繕不廢盤江又南至普安州東又南至九盤山迤東  
至花江汎南有白水河得永甯州北之關嶺壩陵橋  
水南流至鎮甯州西而南合菜子河水至甯谷司又  
南合永豐州西北之打罕河南來注之又有拖長江  
自普安州沙泥崖東南流來注之又有卜者河軟橋  
河東南流注之又南籠府有都威河自安南縣界得  
江西坡水至高武汎西合馬畢河南流合魯溝河過  
普市合大坡哨水東過府南界而東流注之盤江水  
又南至永豐州西南而東南過泗城府入於粵達於

海

見通志

巡撫蔣公宗魯傳

莫友芝

蔣宗魯字道父普安衛人

衛今爲直隸廳

父廷璧字文光嘉

靖元年舉人授青城教諭立教嚴明捐俸以贍寒士

遷國子監助教出判沅江引歸平生孝友恭儉寡言

笑所至人士多淑其化道父十六年舉人十七年進

士知濬縣準田均役無所私縱遷刑部主事三十一

年出爲雲南臨沅兵備副使先是沅江府土舍那鑑

弑其知府那憲攻刼州縣二十九年奉朝命會師分

五哨進勦鑑僞請降左布政使貴溪徐樾以督餉至  
軍不虞其詐慨然請往受之爲所害我兵連歲攻之  
不能克至是帝敕新撫臣鮑象賢鳩兵討賊明年討  
集土漢兵七萬人克期分哨進勦道父率所部先入  
諸路兵猶未集那鑑懼伏藥死道父憤樾之死欲盡  
誅其黨象賢不可僅禽斬首析土官及害樾者數人  
餘悉就撫令鑑子恕還所占掠村寨鎮沅府印補輪  
通賦納八象即貸其死象賢疏聞世宗厭兵遂允之  
時人語曰可憐二品承宣使只值沅江象八條道父

扼腕而已升河南按察使糾伊府之虐且置之法愿  
右布政使三十九年晉副都御史巡撫雲南初四川  
東川土目阿得革謀奪土知府祿位官縱火焚府治  
走武定爲土官所殺其子阿堂賄結烏撒土官入東  
川囚位母安氏奪其印遂與貴州宣慰安萬銓雷益  
土官安九鼎羅雄土官者濟更相仇殺位萬銓等各  
上書訟堂罪詔下雲貴四川撫按官會勘堂聽勘服  
罪而據印仇殺如故雲南巡撫游居敬請致討帝允  
部議行川貴撫按會勘具奏居敬遽調土漢兵五萬

進勦費用不貲賦歛百出遠近騷動巡按王大任劾  
居敬違旨輕動恐生外患乃命逮居敬而以道父代  
之時阿堂聞大兵至逃深箐不出道父至急下令盡  
撤諸路兵陰以土兵誘敗之於野馬川又授計營長  
者阿易駟得阿堂心腹母勒阿濟等啖結之明年母  
勒阿濟伺間掩殺阿堂於戛來以石其子阿哲亦就  
禽自道父履任至事平才數月乃申有司縱盜茸賄  
之罰嚴毅精察吏治一清大理太和點蒼山產文石  
可爲屏玩朝廷采取大爲民病奏罷之因忤嚴嵩引

歸子思忠思孝並四十年舉人思忠官知縣思孝四十四年進士官至副使孫明良天啟元年舉人道父鄉舉之年以巡按奉化王杏及田給事秋請貴州始與雲南分闈開科揭榜之辰黃龍見霄漢間光燭地在事官僚爭額手相慶曰此科目之光盛世之瑞也諸生當有應者自是得人果盛於前是科人即多以名德著而道父文章經濟尤冠一時省志載道父著述有治濬款議疏草詩文集等各若干卷又有齊梁監稅錄

稅千頃堂書目作兌

吳關奏議牧政事宜三種知於所

歷官尚不具載無論行蹟矣今就在滇一二事補詳之諸著述訪求不得惟見滇志一疏黔志一詩而已

其父文光著有家訓政訓二書在青城又著有璞山

教約並未見

附奏罷石屏疏臣准工部咨照依御用監題奉欽依事理依式照數采

取大理石五十塊見方七尺五塊六尺五塊五尺十塊四尺十五塊三尺十五塊等因案行金滄道分委大理衛太和縣督匠采取據耆民段嘉連告稱嘉靖十八年曾奉勘合取大屏石崖險難尋壓傷人眾及至大路行未百里大半損缺眾復采補沿途丟棄所解石塊二年外方得到至三十七年取石六塊見外方三尺五寸自本年六月至十一月始運至普湖小孤山因重丟棄在彼且自大理至小孤山止有三百餘里以半年行三百里未免有違欽限徒勞無功乞轉達奏請量減數目尺寸等因又據石匠楊景時

等告稱原降尺寸高大石料難尋且產於萬丈懸崖  
難以措手縱使采獲勢難扛運等因俱批行布政司  
會議爲照雲南地方僻在萬里舟楫不通與中州平  
坦不相同先年采取三尺石自蒼山至沙橋驛陸運  
祇五程勞費逾四月供給不前所過騷擾軍民啼泣  
今復取六七尺者其難十倍況值上年兵荒民遭飢  
窘流離困苦實不堪命應請量減尺寸通詳巡撫蔣  
宗魯巡按孫用會題議照錫貢方物爲臣子者均當  
効忠民瘼艱難凡守土者尤宜審度前項屏石臣等  
奉命以來催督該道育司親宿山場遵式取進匠作  
者民人等俱稱采石處所山洞坍塌塞崖壁懸陡三四  
尺者設法可獲其五六尺者體質高厚勢難採運且  
道路距京萬有餘里峻嶺陡箐石磴穿雲盤旋崎嶇  
百步九折豎擡則石高而人低橫擡則路窄而石大  
雖有良策委無所施今大理抵省僅十三程尚不能  
運至何由得達於京師是以官民憂惶計無所出議  
將采獲三尺四尺者先行進用五尺者一面設法採  
取六七尺者或准停免以蘇民艱實出於軍民迫切